


Carlo Demichelis

Nòte 'd n'arsercador an pension, da pijé coma material diletantistich socià al pòst "web"
amatorial

<http://digilander.libero.it/dotor43>

Fìsica Sperimental Acùstica - Òtica geométrica

Quarta session



Socià al pòst web amatorial <http://digilander.libero.it/dotor43>

Pàgina lassà veuida apòsta

Presentassion e avertense pér la letura

Coma pér la prima la sonda e la terza session, andova i l'oma vist la mecanica dij corp sòlid, cola dij fluid e la termodinàmica, èdcò pér costa session èd Fisica Sperimental a valo le avertense che i l'oma fàit ambelelà. I arpetoma che, beleché l'autor a sia un fisich e a l'abia fàit l'arsercador tuta soa vita èd travaj, vist che a l'é mai stàit sò mesté èl mostré a l'Università, tut èl material apportà ambelessì a venta che a sia pijà coma **diletantistich**.

An efét ste nòte a son sempe socià al pòst “web” (an italian a-j diso “sito”) amatorial, e pròpi mach amatorial, <http://digilander.libero.it/dotor43> èd l'autor (vis-a-di: mi).

Sì i vardoma doe costion, Acùstica e Òtica geométrica, sempe con èl sòlit but.

Èdcò pér costa part i foma donca 'l sòlit travaj.

TÀULA GENERAL DLE PART

- **Part 1: Acùstica - Prinsipi fisich.** - An costa part as pàrla dle studi dle vibrassion, dle onde e relativa propagassion, second un modèl matemàtic ch'i l'oma già vist ant la prima e ant la sonda session. I parloma d'equassion d'Eulero, d'onde pian-e e d'onde sfériche.
- **Part 2: Acùstica - Propagassion dël son.** - An costa part i comensoma a vardé le misure an sèl son e a defini l'unità d misura "décibel". Peui i passoma a vardé la trasmission dël son, an particolar cand l'onda ch'as propaga a traversa na surfassa d'interfacia fra doi mojen different (arbatiment e rifrassion dël son). Peui as varda lòn ch'a càpita cand él son a treuva d'ostàcoj (diffrassion e dispersion). Dòp i parloma d'interferensa 'd doi son, batiment e onde stassionarie (dont i l'oma già dit quaicòs). A la fin i disoma quaicòs an sla scomposission dël son e la série 'd Fourier.
- **Part 3: Acustica - Generassion e ricsession dël son.** - An costa part i doma n'uciada a com él son a ven generà, sensa andé trop an question elétriche (che i vèddroma ant na session apòsta). Sòn a lassa parlé 'd vos e 'd mûsica, timber dla vos e timber djè strument musicaj, le nòte, com a fonsion-e l'orija, l'audiograma, e via fòrt. I giontoma quaicòs an sla diressionalità d'un generator e d'un ricevitor..
- **Part 1: Òtica geométrica - Le lèj.** - An costa part i doma n'uciada a còs a l'é la lus, quaj ch'a son ij parameter ch'a la carateriso (unità d misura) e quale ch'a son le lèj fondamentàj che a régolo la propagassion dla lus. I vardoma 'd nen dovré trop ij concét dl'òtica ondulatòria, che i tratroma da n'autra part. Arbariment e arfrassion a son ij fenòmeno che pì an anteresso. I parloma 'dcò dël prinsipi 'd Fermat e i foma n'acénn al prinsipi èd Huygens, che i arpijroma peui a la fin èd costa session d'òtica.. Peui i parloma 'ncora d'element òtich (vis-a-di ij prisma, e ij diòtr arbatent e arfrangent). An fin i foma na cita ciaciada an sla difusion dla lus e ij color..
- **Part 2: Òtica geométrica - Ji sistema òtich.** - An costa part i comensoma a parlé 'd lent, e an particolar dl'aprossimassion dla "lent sutila". I vardoma peui cos a l'é un sistema òtich e sò model geométrich. I vardoma j'angrandiment e la formassion dj'imàgin an cola che as dis "aprossimassion èd Gauss". Dòp avèj vist ij sistema con feu, i vardoma ij sistema afocaj o telescopich. Peui i tratroma d'aberassion dij sistema òtich reaj. A la fin i disoma quaicòs an sle fibre òtiche.
- **Part 3: Òtica geométrica - Jë srtument òtich, le matriss.** - An costa part is ocupoma prima 'd com a fonsion-a l'euji e peui i vardoma 'l fonsionament da na mira dl'òrica geométrica, dle lent, ij microscòpi, ij canuciaj, ij telescopi, j'obietiv fotogràfich e ij projector. Tut sòn, coma sempe, sensa andé trop ant l'ancreus. I disoma peui quaicòs an sla arpresentassion dle proprietà dij sistema òtich dovrànd le "matris èd trasferiment" dij ragg, che dle vire a arzulto esse motobi còmode. Coma esempi 'd matris i comensoma a acené a l'arsonador òtich che i artrovroma ant la part "eletrònica" a propòsit dij laser.
- **Part 4: Introduission a l'òtica fisica** - An costa part i parloma d'onde eletromagnétiche e an particolar èd cole luminose. I vardoma la polarisassion dj'onde e cos i voroma d' con coerensa arferia a j'onde luminose. Peui i vardoma l'prinsipi 'd Huygens-Fresnel, l'interferensa dj'onde luminose e la difrassion, andova i vèddroma ij lìmit d'aplicassion dl'òtica geométrica. Tuta sta part a l'é giusta n'introduission. I androma pì ant l'ancreus ant la session dedicà a j'onde eletromagnètriche, che i vèddroma dòp la session d'eleticità e magnetism. A la fin i giontoma quaicòs an sl'arpresentassion dj'onde e an sle aprossimassion che a ven-o fàite. Si a ven bin parlé un pòch dla trasmission dj'onde travers element òtich.
- **Part 5: Òtica dij fass** - An costa part i parloma dij fass èd lus fait da ragg parassiaj. I doma giusta quàich idèja che a vnirà a taj cand i parleroma 'd laser. Is limitoma a parlé dël fass gaussian, e sòn an nòstr but a basta.

Part un - Acùstica - Prinsìpi fisich

An costa part as pàrla dle studi dle vibrassion, dle onde e relativa propagassion, second un modéł matemàtic ch'i l'oma già vist ant la prima e ant la sonda session. I parloma d'equassion d'Eulero, d'onde pian-e e d'onde sfériche.

TÀULA DLA PRIMA PART

Le vibrassion.....	3
Moviment armònich e vibrassion.....	3
Ossilassion nen smortà	3
Ossilassion smortà.....	4
Ossilassion forsà.....	5
Arsonansa.....	6
Vibrassion èd còrde.....	7
Vibrassion longitudinal d'àste.....	9
Le onde dël son	13
Equassion general dj'onde dël son	13
Equassion d'Eulero	13
Equassion èd continuità	14
Equassion dë stat	15
Equassion èd l'onda	16
Onde pian-e.....	16
Arsonansa 'd colòne d'ària.....	19
Tubo sarà ai doi estrem.....	19
Tubo duvert ai doi estrem.....	20
Tubo duvert a n'estrem e sarà a l'autr	21
Element dl'onda dël son pian-a	21
Intensità dël son	22
Densità d'energia	23
Potensa dël son.....	24
Impedensa	24
Onde sfériche	25
Element dl'onda dël son sférica.....	28
Intensità dël son	29
Densità d'energia	29
Impedensa	30

TAULA DLE FIGURE DLA PRIMA PART

Figura 1 - Ossilator armònic.....	3
Figura 2 - Ossilassion smortà	4
Figura 3 - Arsonansa	7
Figura 4 - Vibression èd na còrda.....	8
Figura 5 - Vibression longitudinaj ant na bara elàstica.....	9
Figura 6 - Vibression longitudinaj èd na bara lìbera.....	11
Figura 7 - Equassion d'Eulero.....	13
Figura 8 - Onda pian-a ant na colòna d'ària.....	17
Figura 9 - Arsonansa ant un tubo sarà ai doi estrem.....	19
Figura 10 - Arsonansa ant un tubo duvert ai doi estrem	20
Figura 11 - Arsonansa ant un tubo duvert a n'estrem e sarà a l'àutr	21
Figura 12 - Coordinà sfériche	26

LE VIBRASSION

L'Acùstica a trata dla generassion, la propagassion e la ricection dël son. An general ël son a l'é fait da onde elàstiche mecaniche che a peulo esse ant l'interval ëd frequense andova l'orija dl'òm a l'é sensìbil, ma che a peulo 'dcò avèj frequense pì basse, òpura frequense pì àute (ant l'ordin, infrason e ultrason).

Ëdcò 'l mojen andova 'l son as propaga a peul esse different da l'ària, coma pr'esempi aqua, líquid an general e sólid. A propòsit ëd propagassion pér onde i l'oma già vist quaicòs an mecanica dij sólid e an cola dij flùid. Sì i arpijoma 'l discors an manera orientà, an particolar, al son ch'as propaga ant l'ària, al produve e sente 'l son.

A l'é sens'ètr da ten-e present lòn ch'i l'oma dit a propòsit dle vibrassion. Tut sòn as treuva ant la part ses dla prima session ëd coste nòte. Quaicòs i l'oma dit ëdcò a propòsit d'elastissità ant la part doi dla session doi, e peui ant la part set dl'istéssa session. A venta 'dcò ten-e present j'equassion dël moviment d'un flùid. Sì i vardoma la còsa da na mira un pòch differenta. I arciamoma, macassìa, e i arpetoma ij concèt ëd base.

Moviment armònich e vibrassion

El modél ël pì sempi 'd moviment armònich a l'é col ëd na massa an echilibri fra sò pès e la reassion ëd n'arsòrt ch'a lo ten sù. Sto sistema a l'ha na posission d'echilibri andova la tension dl'arsòrt a compensa 'l pès dla massa. Se la massa a ven spostà da costa posission e peui lassà 'ndé, a comensa a ossilé antorna a costa posission d'echilibri, dal moment che l'arsòrt a svilupa na fòrsa adissional che a tira a aporté la massa ant la posission d'echilibri. An general a venta 'dcò ten-e cont ëd na resistensa che as opon al moviment e che i podoma supon-e proporsional a la velocità dël moviment midem. Sto tipo d'ossilator a l'é ilustrà an figura 1.




Figura 1 - Ossilator armònich

Se i voroma scrive l'equassion dël moviment dël barisenter dla massa m , i consideroma che a l'echilibri la posission dël barisenter a peul esse pijà coma zero ëd n'ass vertical y , e che an costa posission la tension dl'arsòrt a compensa 'l pès $m \cdot g$ ëd nòstra massa m . Se la massa a ven spostà an vertical, e i suponoma che a sia sbassà, l'arsòrt a aumenta soa tension : a l'ha na deformassion y e a svilùpa na reassion f_a che as opn a lë spostament, che a l'é proporsional a lë spostament midem: $f_a = -k \cdot y$.

Ossilassion nen smortà

Pér adéss i podoma nen consideré le resistense passìve e dì che ant ògni moment la derivà dla quantità 'd moviment dla massa rispét al temp a venta ch'a sia ugual a costa fòrsa. Donca:

$$\frac{\partial^2 y}{\partial t^2} \cdot m = -k \cdot y \quad \text{opura} \quad \frac{\partial^2 y}{\partial t^2} = \frac{-k}{m} \cdot y \quad \text{opura 'ncora} \quad \frac{\partial^2 y}{\partial t^2} + \frac{k}{m} \cdot y = 0$$

Costa a l'é l'equassion diferensial dël moviment ch'i l'oma suponù. Se i butoma che $\omega = \sqrt{\frac{k}{m}}$ (le dimension èd ω a son [rad/sec] vis-a-dì na velocità angolar) st'equassion a l'ha coma solussion la forma : $y(t) = A \sin \omega t + B \cos \omega t$

St'arzultà a peul èdcò esse butà ant la forma :

$$y(t) = \sqrt{A^2 + B^2} \sin(\omega t + \theta) \quad \text{opura} \quad y(t) = \sqrt{A^2 + B^2} \cos(\omega t - \phi)$$

andova A, B a son costant d'integrazion coma θ e ϕ che a son j'angoj èd fase inissiaj.

Com i l'avio già vist ant la prima session, i arpetoma, giusta pér nen dësmentiélo, che un moviment periòdich a l'é caraterisà da na frequensa f (ossilassion ant un second), dàita da $f = \omega / 2\pi$. L'unità 'd misura pér la ferquensa a l'é ël *Hertz* (Hz).

Ossilassion smortà

Sensa fòrse 'd dissipassion ste ossilassion periòdiche a contínuo a l'anfinì. Le fòrse 'd dissipassion, che a-i son sempe, an figura a son arpresentà da l'amortiseur, che a antroduv un termo proporsional a la velocità e ch'as opon a costa.

$$\frac{\partial^2 y}{\partial t^2} \cdot m = -r \frac{\partial y}{\partial t} - k \cdot y \quad \text{opura} \quad \frac{\partial^2 y}{\partial t^2} + \frac{r}{m} \cdot \frac{\partial y}{\partial t} + \frac{k}{m} \cdot y = 0$$

e se i butoma $\omega = \sqrt{\frac{k}{m}}$ e $2\delta = \frac{r}{m}$ i otnoma

$$\frac{\partial^2 y}{\partial t^2} + 2 \cdot \delta \cdot \frac{\partial y}{\partial t} + \omega^2 \cdot y = 0$$

Ël risultà dl'integrazion dë st'equassion diferensial a dipend dal valor dle costant ω^2, δ , che a son sempe positive, (δ a ven ciamà coeficent dë smortament) e a-i son ij tre cas:

$$\text{Pér } \delta < \omega \quad x = e^{-\delta \cdot t} \cdot A \cdot \cos(\alpha \cdot t + \vartheta) \quad \text{andova} \quad \alpha = \sqrt{\omega^2 - \delta^2}$$

$$\text{Pér } \delta = \omega \quad x = e^{-\delta \cdot t} \cdot (A + B \cdot t)$$

$$\text{Pér } \delta > \omega \quad x = e^{-\delta \cdot t} \cdot (A \cdot e^{\beta \cdot t} + B \cdot e^{-\beta \cdot t}) \quad \text{andova} \quad \beta = \sqrt{\delta^2 - \omega^2}$$

Intromma nen ant la tecnica èd solussion dl'equassion (ch'as vardà la session dj'utiss matemàtich), ma i arportoma an figura 2 ij tipo èd grafich che as oten-o ant ij tre cas.




Figura 2 - Ossilassion smortà

Mach ant ël prim cas a-i é ancora n'ossilassion, ma as peul nen disse che a sia periòdica. A-i è un interval ed temp T costant pér ël passagi dal pont d'echilibri ant la stessa diression, ma a sto pont la velocità a diminuiss vira pér vira. L'interval T a l'é pì long ed col che a sarìa stabilì mach da massa e coeficent elàstich. Ël massim dl'ossilssion a diminuiss, a ògni ciclo, an manera esponensial con ël temp.

As vödd che l'ampiëssa a cala coma $e^{-\delta t}$ e ël temp fra un passagi e l'àutr da la posission d'echilibri a l'é:

$$T = \frac{2 \cdot \pi}{\sqrt{\omega^2 - \delta^2}} \quad \text{anvece che} \quad T = \frac{2 \cdot \pi}{\omega}$$

Sto temp a ven ancora ciamà "**period**" e a l'é pì longh ed col che i l'avriù sensa smortament. Cand $\delta = \omega$ as vödd che T a perd so significà e donca 'l moviment a l'é pì nen periòdich.

Ossilassion forsà

Suponoma adess un sistema elàstich real che daspérchiél a sarìa un sistema ossilant smortà, coma col che i l'oma già vist prima. A sto sistema aplicoma na fòrsa, pér adéss generica, $f(t)$. An costa manera l'equassion che a dëscriv ël moviment dël sistema a dventa:

$$m \cdot \ddot{x} + r \cdot \dot{x} + k \cdot x = f(t)$$

che a peul esse scrivùa, con le posission viste fin-a sì, coma:

$$\ddot{x} + 2 \cdot \delta \cdot \dot{x} + \omega^2 \cdot x = f(t)$$

La solussion ed Costa equassion diferensial, che a l'é nen omogenia, a l'é dël tipo $x = x_0 + x_1$ andova x_0 a l'é l'integral general dl'equassion omogenia (cola che as oten butand $f(t) = 0$), e x_1 al'è n'integral particolar qualonque dl'equassion completa (vardé le nòte 'd matemàtica). Ël termo x_0 a arpresenta l'ossilassion lìbera smortà dël sistema. I l'oma già vistla e notoma che sto termo, dòp un period inissial, a va a zero e a anfluiss pì nen.

Pér ël termo x_1 i notoma che a l'é d'anteresse cand la fòrsa $f(t)$ aplicà a l'é armònica, vis-a-dì dël tipo $f(t) = F \cdot \cos(\Omega \cdot t)$. Se i butoma $\Phi = \frac{F}{m}$, l'equassion a dventa:

$$\ddot{x} + 2 \cdot \delta \cdot \dot{x} + k \cdot x = \Phi \cdot \cos(\Omega \cdot t)$$

La solussion general ed Costa equassion a l'é dël tipo:

$$x = x_0 + x_1 = A_0 \cdot e^{-\delta \cdot t} \cdot \cos(a \cdot t + \delta) + A \cdot \cos(\Omega \cdot t - \vartheta)$$

$$\text{i notoma an ciàir che } x_1 = A \cdot \cos(\Omega \cdot t - \vartheta)$$

Se i consideroma l'equassion a regim, vis-a-dì dòp un temp a basta long da podèj consideré ël prim termo dlë scond member bastansa davzin a zero da pì nen anfluì, a basta stabilì ël valor d'A e ëd θ pér arzolve nòstr problema.

Pér trové sti valor i consideroma che x_1 a venta che a sia solussion dl'equassion $x = x_0 + x_1$ e, dal moment che:

$$\dot{x}_1 = -\Omega \cdot A \cdot \sin(\Omega \cdot t - \vartheta) \quad \text{e} \quad \ddot{x}_1 = -\Omega^2 \cdot A \cdot \cos(\Omega \cdot t - \vartheta)$$

i podoma scrive che:

$$-\Omega^2 A \cdot \cos(\Omega \cdot t - \vartheta) - 2 \cdot \delta \cdot \Omega \cdot A \cdot \sin(\Omega \cdot t - \vartheta) + \omega^2 \cdot A \cdot \cos(\Omega \cdot t - \vartheta) = \Phi \cdot \cos(\Omega \cdot t)$$

e cheuijend a fator comun:

$$(\omega^2 - \Omega^2) \cdot A \cdot \cos(\Omega \cdot t - \vartheta) - 2 \cdot \delta \cdot \Omega \cdot A \cdot \sin(\Omega \cdot t - \vartheta) = \Phi \cdot \cos(\Omega \cdot t)$$

Costa espression a venta che a sia sodisfàita pér ògni valor èd t , e an particolar: pér $\Omega \cdot t - \vartheta = 0$ a dventa:

$$(\omega^2 - \Omega^2) \cdot A = \Phi \cdot \cos \vartheta$$

pér $\Omega \cdot t - \vartheta = \frac{\pi}{2}$ a dventa:

$$-2 \cdot \delta \cdot \Omega \cdot A = -\Phi \cdot \sin \vartheta$$

Da coste espression as arcava, sensa fé tuti ij passagi:

$$A^2 = \frac{\Phi^2}{(\omega^2 - \Omega^2)^2 + 4 \cdot \delta^2 \cdot \Omega^2} ; \tan \vartheta = \frac{2 \cdot \delta \cdot \Omega}{\omega^2 - \Omega^2}$$

A sta mira arcordoma che $\delta = \frac{r}{m}$ andova r a l'é èl coeficent dël termo èd resistensa passiva. Arcordoma èdcò che ω a l'é la pulsassion natural dël sistema e Ω a l'é la pulsassion dla fòrsa esterna.

Arsonansa

As vëdd da l'espression dl'ampiëssa dl'ossilassion a regim, che se Ω a dventa istess a ω , èl denominator a l'ha un valor minim, e donca l'ampiëssa a l'é massima. A stabilì st'ampiëssa però, a concor èdcò èl fator d'ësmortament δ .

Vardoma da na mira analitica còs a suced. Pijand l'espression dl'ampiëssa, i podoma prima divide numerator e denominator pér ω^4 . As oten:

$$A^2 = \frac{\frac{\Phi^2}{\omega^4}}{\frac{\omega^4}{\omega^4} - \frac{2 \cdot \omega^2 \cdot \Omega^2}{\omega^4} + \frac{\Omega^4}{\omega^4} + \frac{4 \cdot \delta^2 \cdot \Omega^2}{\omega^4}}$$

Se adess i butoma $q = \frac{\Omega^2}{\omega^2}$ e $\psi = \frac{\delta}{\omega}$ as oten:

$$A^2 = \frac{\frac{\Phi^2}{\omega^4}}{1 - 2 \cdot q + q^4 + 4 \cdot \psi^2 \cdot q^2} = \frac{\frac{\Phi^2}{\omega^4}}{(1 - q^2)^2 + 4 \cdot \psi^2 \cdot q^2}$$

Tnima cont che nòstra variabil a l'é Ω , e pér trové èl massim d'A i sercoma èl minim dël denominator. Derivand rispét a q e ugualiand a zero as oten un minim pér:

$$q = \sqrt{1 - 2 \cdot \psi^2}$$

Sòn a dis che nen sempe un massim a-i é. An efet, pérchè a-i sia un massim ant él camp real, a venta che l'espression sota radis a sia nen negativa. A venta donca che a sia $\psi^2 < 0,5$. Sòn a veul dì che le resistense passive a venta nen che a sio très grosse.

Se $\psi^2 > 0,5$, l'ampiessa a diminuiss an manera costanta con él chérse dla frequensa dla fòrsa esterna (dàit sperimental) mentre se $\psi^2 = 0,5$ antlora l'ampiessa as mantén motobin costanta fin-a a $\Omega = \omega$, e peui a comensa a calé.

Pì cit a l'é lë smortament, pì àuta a l'é l'ampiessa massima. An teorìa, se a-i fussa nen d'autut dë smortament, pér qualonque intensità ed fòrsa, l'ampiessa massima a tirerà a andé a l'anfinì.

La condission ed frequensa che a pòrta a l'ampiessa massima a ven dita **arsonansa**.

Se i vardoma cos a fa la fase dl'ossilassion rispét a cola dla fòrsa esterna, i vèddoma che, an condission d'arsonansa le doe ossilassion a son sempe an quadratura, vis-a-dì che a l'han na diferenza ed fase ugual a $\pi/2$. Pér frequense forsà pì basse ed cola d'arsonansa la fase a tira vers zero, pér frequense pì àute a tira a vnì ugual a π . Pì la resistensa a l'é cito, pì la fase a varia ampressa ant l'antorn d'arsonansa, coma as peul vèdde an figura 3, andova a ven mostrà, an fonsion dla frequensa "d'ecitassion", ampiessa e fase con ψ pijà coma parameter. La figura a l'é mach andicativa.




Figura 3 - Arsonansa

Vibrassion ed còrde

I arpijoma sto sogét da na mira un pòch diferenta rispét a lòn ch'i l'oma vist ant la prima session. I suponoma d'avèj na còrda fissà ai doi cavion, con na dàita longhëssa L , na dàita tension τ e na dàita massa pér unità 'd longhëssa ρ . I suponoma che la tension τ a resta costanta durant él moviment (che i suponoma sempe cit). La corda a ven portà fòra da soa posission d'echilibri e peui lassà vibré sensa fòrse da fòra. Is arferima a figura 4.

An figura a l'é arpresentà un segment anfinitésim dx dla còrda, ant la genérica posission x , che a l'avrà na massa $dm = \rho \cdot dx$. I suponoma che 'l moviment a sia mach arlongh la diression dl'ass y vertical, e i scrivoma cola ch'a deuv esse l'equassion pér él moviment ed cost segment. La tangent a la curva fàita da nòstra còrda an x a fà l'angol β , mentre an $x + dx$ l'angol formà da la tangent a l'é α . Le fòrse verticaj dàite da la tension τ (fòrsa pér unità 'd surfassa [N / m^2]) dla còrda a saran antlora $-\sin \beta \cdot \tau$ e $\sin \alpha \cdot \tau$.

L'equassion diferensial dël moviment a ven da la lèj ed Newton $\mathbf{F} = m \cdot \mathbf{a}$, che an nòstr cas a dventa:

$$-\tau \cdot \sin \beta + \tau \cdot \sin \alpha = \rho \cdot dx \frac{\partial^2 y}{\partial t^2}$$




Figura 4 - Vibrassion ëd na còrda

Adéss i consideroma che jë spostament a son supòst cit, e donca i l'oma che $\sin \alpha \cong \tan \alpha$ e 'dcò che $\sin \beta \cong \tan \beta$. Peui i notoma che : $\left[\frac{\partial y}{\partial x} \right]_{x=x} = \tan \beta$ e che $\left[\frac{\partial y}{\partial x} \right]_{x=x+dx} = \tan \alpha$.

A sta mira nòstra equassion a dventa :

$$\rho \cdot dx \frac{\partial^2 y}{\partial t^2} = \frac{\tau}{\rho} \frac{\left[\frac{\partial y}{\partial x} \right]_{x+dx} - \left[\frac{\partial y}{\partial x} \right]_x}{dx}$$

L'espression a lë scond member, gavà 'l fator τ/ρ , a l'é nen d'autr che 'l rapòrt incremental ëd $\frac{\partial y}{\partial x}$ e donca, pér dx che a tend a zero, a l'é la derivà sonda $\frac{\partial^2 y}{\partial x^2}$. L'equassion a dventa:

$$\rho \cdot dx \frac{\partial^2 y}{\partial t^2} = \frac{\tau}{\rho} \frac{\partial^2 y}{\partial x^2}$$

che a l'é l'equassion dl'onda. St'equassion a peul esse arzolvùa con ël sistema dla separassion dle variàbij, dël tipo $y(x, t) = X(x) \cdot T(t)$. I podoma peui ciámé $a = \sqrt{\frac{\tau}{\rho}}$. I l'avroma donca:

$$\frac{\partial^2 y}{\partial x^2} = T \cdot \frac{d^2 X}{dx^2} ; \quad \frac{\partial^2 y}{\partial t^2} = X \cdot \frac{d^2 T}{dt^2}$$

e a sta mira nòstra equassion a dventa:

$$X \frac{d^2 T}{dt^2} = a^2 T \frac{d^2 X}{dx^2} \quad \text{e, separand le variàbij,} \quad \frac{d^2 T}{dt^2} = a^2 \frac{d^2 X}{dx^2}$$

Dal moment che X e T a son andipendente l'un-a da l'autra e che l'espression a val pér tutte le x e tutti ij t , a venta che ij doi member a sio uguaj a l'istessa costant, che pér comodità i ciámoma $-p^2$. I l'oma antlora le doe equassion:

$$\frac{d^2T}{dt^2} + p^2 T = 0 \quad ; \quad \frac{d^2X}{dx^2} + \frac{p^2}{a^2} X = 0$$

Da coste equassion i arcavoma (vardé le nòte 'd matamàtica) le fonsion $X(x)$ e $T(t)$ che i podoma dovré an nòstra equassion èd partensa. I otnoma:

$$y(x, t) = \left(A \sin \frac{px}{a} + B \cos \frac{px}{a} \right) \cdot (C \sin pt + D \cos pt)$$

Se i consideroma le condission al contorn che a diso che la còrda a l'é fissà ai doi cavion, i l'avromma che $y(0, t) = 0$ e che $y(L, t) = 0$. Da coste condission i arcavoma :

$$0 = B \cdot (C \sin pt + D \cos pt) \quad ; \quad 0 = A \sin \frac{pL}{a} (C \sin pt + D \cos pt)$$

La costant B a l'é donca sens'èstr zero, la costant A a peul nen esse zero, dësnò la còrda a sarìa férma, e donca a venta che a sia : $\sin \frac{pL}{a} = 0$.

Da cost'ùltima espression i arcavoma che a son solussion tute cole che a rendo sodisfàita costa espression, donca cole che a l'han $p = n \cdot \pi \frac{a}{L}$. An costa espression a e L a son paràmeter dla còrda e n a l'é un nùmer antrégn qualonque. I l'oma donca un nùmer anfinì 'd solussion che a corispondi ai valor $p_n = n \cdot \pi \frac{a}{L}$, con n che a và da 1 a l'anfinì. Pér èl valor 1 i l'oma la frequensa ò nòta fondamental dla còrda, mentre j'ètri valor a dan j'armòniche che a stabilissò 'l timber dla nòta (sòn i lo vèddroma dòp). L'equassion general a dventa:

$$y(x, t) = \sum_{n=1}^{\infty} \left(\sin \frac{n\pi x}{L} \right) (C_n \sin p_n t + D_n \cos p_n t)$$

con C_n e D_n costant che a dipendo da ampiëssa e fase inissiaj.

Vibrassion longitudinal d'àste

I suponoma adéss n'èsta con na dàita longhëssa L , na dàita session trasversal A e un dàit mòdul d'elastissità E . I suponoma che l'àsta a sia séde 'd na përturbassion longitudinal, antrodotovùa, pr'esempi da na martlìa a na dàita mira su un dij doi estrem. Is arferima a figura 5.




Figura 5 - Vibrassion longitudinaj ant na bara elàstica

I l'oma già vist ant la prima session, part set la propagassion èd n'impuls longitudinal ant na bara e i l'oma vist cola ch'a l'é la velocità 'd propagassion èd n'impuls. Sì i arportoma lòn ch'i l'avio dit ambelelà, giusta pér avèjlo sotman.

Se i procura n'urt longitudinal a na ponta dla sbara, aplicand na fòrsa F (valor medi) pér un temp Δt (motobin cit), sota l'assion dla fòrsa na cita porsion dla sbara a ven comprimùa. La pression provocà an sla surfassa da l'urt, a viagia ant la sbara a na dàita velocità, e, ant él temp Δt che la fòrsa a agiss, a riva a anteressé na part Δl dla sbara. Ciamoma c la velocità èd propagassion, pér adéss nen conossùa. I voroma mach fé noté che sì i stoma ipotisand un comportament bin diferent da col èd na sbara an teorìa rèida.

Donca i l'oma n'impuls $i = F \cdot \Delta t$ che ant él temp Δt a anteressa la longhëssa $\Delta l = c \cdot \Delta t$. Sta part dla sbara a l'ha na massa $\Delta m = c \cdot \Delta t \cdot A \cdot \rho$

Sto tràit dë sbara, sota l'assion dla fòrsa F a patiss na deformassion (as èscursa) èd Δx . Second lòn che i l'oma vist a propòsit èd deformassion elàstiche, Δx a val

$$\Delta x = \frac{I}{E} \cdot \Delta l \cdot \frac{F}{A} \quad \text{andova} \quad E = \text{mòdul d'elastissità a trassion (an } N/m^2\text{)}$$

Dòp él temp Δt la porsion comprimùa a aplica l'istess impuls a la part dla sbara che a ven dòp. Sta part a patiss l'istess process. Donca l'impuls as propaga ant la sbara con na velocità c .

Da na mira dinàmica a suced che la massa $\Delta m = c \cdot \Delta t \cdot S \cdot \rho$ as èspòsta èd Δx sota l'assion dla fòrsa F , con na velocità dàita da $\frac{\Delta x}{\Delta t}$ e donca la variassion èd quantità èd moviment a venta che a sia ugual a l'impuls arsevù, vis-a-dì:

$$\Delta m \cdot \frac{\Delta x}{\Delta t} = F \cdot \Delta t$$

$$\text{e i consideroma èdcò che la velocità èd propagassion a l'é } c = \frac{\Delta l}{\Delta t}$$

Se i foma tute le sostitussion i rivoma a la fin a scrive:

$$c \cdot \Delta t \cdot S \cdot \rho \cdot \frac{\Delta x}{\Delta t} = \frac{\Delta x}{\Delta l} \cdot E \cdot A \cdot \Delta t \quad ; \quad c \cdot \rho = \frac{\Delta t}{\Delta l} \cdot E \quad ; \quad c \cdot \rho = \frac{E}{c}$$

$$\text{e donca } c = \sqrt{\frac{E}{\rho}}$$

La velocità èd propagassion a dipend parèj mach da le carateristiche dël material, an particolar da soa densità e sò mòdul d'elastissità.

Sì i vardoma che, coma pér la còrda ch'i l'oma vist prima, la bara a l'ha 'd soe frequense d'osilassion. I studioma donca che moviment a peulo stabbilise ant la bara.

Èdcò anbelessì i ciamoma u lë spostament èd n'element anfinitésim dx dla bara ant na posission x qualonque. I ciamoma "**deformassion** ε_x " ant él pont x èl rapòrt $\varepsilon_x = \frac{\partial u}{\partial x}$. La bara a l'é elàstica e i disoma E sò mòdul d'elastissità. Lë sfòrs σ_x ant él pont x a sarà donca $\sigma_x = E \cdot \varepsilon_x$, e la fòrsa 'd tension F_x dla bara ant la session an x (èd surfassa A) a sarà : $F_x = \int_A \sigma_x dA = E A \frac{\partial u}{\partial x}$.

Se i consideroma l'element èd bara anfinitésim longh dx , i podoma d' che an sla surfassa A_x an posission x , la fòrsa 'd tension che a agiss a l'é $-F$, mentre an sla surfassa A_{x+dx} an posission $x+dx$, la fòrsa che a agiss a l'é $F_{x+1} = F_x + \frac{\partial F}{\partial x} dx$. I scrivoma antlora che la fòrsa total a deuv esse ugual a la massa pér l'acelerassion:

$$F_x + \frac{\partial F}{\partial x} dx - F_x = \rho A dx \frac{\partial^2 u}{\partial t^2}$$

andova $\rho A dx$ a l'é la massa dl'element èd bara. Se i butoma che $a = \sqrt{\frac{E}{\rho}}$ (velocità 'd propagassion) e i foma la sostitussion, i otnoma :

$$\frac{\partial^2 u}{\partial t^2} = a^2 \frac{\partial^2 u}{\partial x^2}$$

pròpi coma prima, ma adéss i l'oma che u a l'é lë spostament longitudinal dla session dla bara ant èl pont x e peui che $a = \sqrt{\frac{E}{\rho}}$, con E mòdul d'elastissità dla bara e ρ soa densità.

Pér arzolve st'equassion i dovroma un sistema dèl tipo 'd col dovrà pér la còrda 'd prima. I pijoma na solussion dèl tipo : $u(x, t) = X(x) T(t)$. La forma a l'é l'istessa 'd cola 'd prima, e donca 'dcò la solussion general èd costa equassiona l'é dèl tipo :

$$u(x, t) = \sum_{n=1}^{\infty} (A_n \cos p_n t + B_n \sin p_n t) \cdot \left(C_n \cos \frac{p_n}{a} x + D_n \sin \frac{p_n}{a} x \right)$$

An costa espression A_n e B_n a son costant che as determino second le condission al contorn, C_n e D_n as determino second le condission inissiaj e p_n a son le pulsassion ($\omega = 2\pi f$) pròprie dèl sistema. Le condission al contorn a podrò esse : Bara lìbera ai doi estrem, Bara fissà ai doi estrem, Bara fissà a n'estrem e libera a l'autr.

I podoma fé n'esempi 'd na bara lìbera ai doi estrem, com a podrò esse cola an figura 6, sospèisa a doi fij sutij, che a cambio gnente an nòstr problema.




Figura 6 - Vibrassion longitudinaj èd na bara lìbera

Gavà l'ùrt inissial che a pròvoca la përturbassion, an coste condission i l'oma che le fòrse ch'as esèrcito a j'estrem dla bara a son zero. I l'avroma donc che :

$$\left[\frac{\partial u}{\partial x} \right]_{x=0} = 0 \quad ; \quad \left[\frac{\partial u}{\partial x} \right]_{x=L} = 0$$

Se i sostituima la prima condission ant la solussion general i podoma arcavé che pér qualonque n a l'é :

$$\frac{\partial u(0,t)}{\partial x} = 0 = \frac{D_n p_n}{a} (A_n \cos p_n t + B_n \sin p_n t) \quad \text{e da sì } D_n = 0$$

La sconda condission a pòrta a:

$$\frac{\partial u(L,t)}{\partial x} = 0 = -\frac{C_n p_n}{a} \cdot \sin \frac{p_n L}{a} (A_n \cos p_n t + B_n \sin p_n t)$$

e dal moment che C_n a peul nen esse sempe zero (dësnò a-i sarìa nen moviment), antlora a venta ch'a sia $\sin\left(\frac{p_n L}{a}\right) = 0$ pér qualonque p_n .

Da costa condission, coma prima, i podoma arcavé le frequense che la bara a-j vibra ansima. A son cole che a sodisfo a l'ugualiansa $p_n = \frac{n\pi a}{L}$. La vibrassion a l'ha donca coma lèj :

$$u(x,t) = \sum_{n=1}^{\infty} C_n \cos \frac{n\pi x}{L} (A_n \cos p_n t + B_n \sin p_n t)$$

I arcordoma che i l'oma fàit l'ipòtesi d'onde longitudinaj, ma ant ij sólid (e ant ij flùid viscos), dal moment che a peulo essie fòrse 'd taj, a peulo essie 'dcò onde trasversaj che a fan lë studi motobin complicà. Sì jë vardoma nen.

LE ONDE DËL SON

I l'oma vist prima d'esempi 'd vibrassion èd còrp sòlid. Adéss is ocupoma d'onde sonore e vibrassion ant un gas coma l'ària e, an general, ant un flùid. Èdcò pér sòn i arpijroma quaicòs èd lòn ch'i l'oma già dit ant la prima session, part set.

Adéss i partoma da na mira un pòch differenta. I consideroma un procéss èd propagassion andova la viscosità dël mojen a peussa esse trascura (flùid pèrfét) e i dovroma le equassion fondamentaj dij flùid (equassion d'Eulero, èd continuità e l'equassion dë stat). Sensa la përturbassion sonora èl mojen (che da sì anans i ciamroma giusta "aria") a l'avrà d'element èd volum $dV = dx dy dz$ (arferì a na trien-a cartesian-a) con na dàita densità ρ_0 , na dàita pression p_0 , na dàita temperatura T_0 e 'dcò na dàita velocità v_0 (che a podrìa 'dcò esse ugual a zero). I consideroma che, andrinta al volumet dV , sti parameter a son j'istéss pér ògni pont.

Sì i arpijoma lòn ch'i l'oma vist a propòsit d'elastissità e dël moviment dij flùid (sonda session èd coste nòte).

Equassion general dj'onde dël son

I comensoma a arcavé st'equassion ant èl cas èl pì general, e peui i vardroma pì an particolar le onde pian-e e le onde sfériche. Pér fè sòn, com i l'oma dit, is arfoma a j'equassion fondamentaj dij flùid (e, an general, dij materiaj elàstich).

Equassion d'Eulero

A esprimo, pér ij flùid, la sonda lèj èd Newton, che a dis che la fòrsa che a agiss an 's na massa a pròvoca n'acelerassion proporsional a la fòrsa midema e a la massa. ($F = m \cdot a$).

I consideroma 'l volumet èd flùid ch'i l'oma anmaganà sì dzora, e che sì i ciamoma V_0 , e i pensoma a soa massa $\rho \cdot V_0$. Con p i ciamoma la "**pression sonòra**", vis-a-dì la pression total p_t meno la pression d'arpòs p_0 . I suponoma che costa pression a chërsa ant la diression dl'ass x , còsa che a lìmita gnente.

I suponoma donca che a-i sia, an costa diression, un gradient èd pression $\frac{\partial p}{\partial x}$. Is arferima a figura 7.




Figura 7 - Equassion d'Eulero

I consideroma le doe face dël volumet normaj a la diression x (le face $dy dz$) e i notoma che la diferensa 'd pression fra coste doe face a l'é nen d'autr che $\frac{\partial p}{\partial x} dx$. D'autra part la surfassa 'd coste face a l'é dàita da $dy \cdot dz$, e donca la fòrsa che a agiss an sël volumet an diression x a sarà:

$$\varphi_x = f_x - f_{x+dx} = -\frac{\partial p}{\partial x} dx dy dz = -\frac{\partial p}{\partial x} V_0$$

Se adéss i ciamoma u_x la component dla velocità dla particola arlongh l'ass x , dal moment che ρ a l'é la densità (massa pér unità 'd volum) dël flùid, i podoma scrive l'espression dla massa pér l'acelerassion coma $\rho V_0 \frac{du_x}{dt}$ e, ugualiand le doe expression i l'oma :

$$-\frac{\partial p}{\partial x} V_0 = \rho \frac{du_x}{dt} V_0 \quad \text{vis - a - dì} \quad \frac{\partial p}{\partial x} = -\rho \frac{du_x}{dt}$$

Adéss a ventrià ten-e cont che la velocità a l'é nen mach fonsion dël temp, ma a peul esse 'dcò fonsion dla coordinà x , e donca i l'avriò che : $\frac{du_x}{dt} = \frac{\partial u_x}{\partial t} + u_x \frac{\partial u_x}{\partial x}$. A venta però ten-e cont che

'l termo $u_x \frac{\partial u_x}{\partial x}$ a l'é motobin cit e donca a peul esse trascurà (la variassion ant ël temp a l'é motobin pì gròssa dla variassion ant lë spassi). La derivà total a peul donca esse sustituìa da la derivà parsial.

Se i arfoma l'istéss rasonament pér le diression y e z , a la fin i otnoma le tre equassion scalar: $\frac{\partial p}{\partial x} = -\rho_0 \frac{du_x}{dt}$; $\frac{\partial p}{\partial y} = -\rho_0 \frac{du_y}{dt}$; $\frac{\partial p}{\partial z} = -\rho_0 \frac{du_z}{dt}$. I l'oma butà ρ_0 al pòst ëd ρ pérchè i l'oma suponù 'd podèj consideré la densità costanta, còsa che a arzulta 'd sòlit giusta.

I podoma scrive ste tre equassion ant n'unica forma vетorial che a l'é:

$$- \text{grad } p = \rho_0 \frac{\partial \vec{v}}{\partial t}$$

Equassion ëd continuità

La fòrsa che a agiss su nòstr volumet, (che sì i antendoma coma "particola") a pròvoca nè spostament dle face dël volumèt midem. Se i consideroma la diression dl'ass x sto spostament a anteressa le doe face paraléle $dy dz$. Donca a-i sarà 'd massa che a intra ant ël volumet e 'd massa che a seurt. Ël prinsipi 'd continuità a dis che la diferensa dla massa che a intra e che a seurt a venta che a corisponda a la variassion ëd massa andrinta al volumet.

I ciamoma donca s jë spostament dle face, che a l'é different fra le doe face paralele. A-i é donca un gradient $\frac{\partial s}{\partial x}$ dlë spostament arlongh l'ass x e pér la massa che a intra e che a seurt i podoma scrive la diferensa:

$$\rho s_x dy dz - \rho \left(s_x + \frac{\partial s}{\partial x} dx \right) dy dz = \rho \frac{\partial s_x}{\partial x} dx dy dz$$

I notoma peui che l'istéss rasonament a peul esse fàit pér j'autre doe diression, e a la fin as oten col che a l'é 'l fluss total ëd massa Φ_x travers la surfassa 'd nòstr volumet.

$$\Phi_x = \rho \frac{\partial s_x}{\partial x} dx dy dz + \rho \frac{\partial s_y}{\partial y} dx dy dz + \rho \frac{\partial s_z}{\partial z} dx dy dz$$

Sto fluss a venta che a corrisponda a na variassion ëd densità andrinta al volumet, e donca i l'avroma che

$$\rho \frac{\partial s_x}{\partial x} dx dy dz + \rho \frac{\partial s_y}{\partial y} dx dy dz + \rho \frac{\partial s_z}{\partial z} dx dy dz = -(\rho - \rho_0) dx dy dz$$

A sta mira i definìma un pàrameter che i ciamoma "**condensassion dël mojen**", ðan costa manera: $\delta = \frac{\rho - \rho_0}{\rho}$ sta relassion a l'é an pràtica ugual a $\delta = \frac{\rho - \rho_0}{\rho_0}$.

L'equassion ëd prima a dventa antlora : $\frac{\partial s_x}{\partial x} + \frac{\partial s_y}{\partial y} + \frac{\partial s_z}{\partial z} = -\delta$, che a peul esse scrivùa, coma vètor : $\operatorname{div} \vec{s} = -\delta$.

Derivand costa espression rispét al temp (variassion da quantità 'd massa ant ël temp) :

$$\frac{\partial \delta}{\partial t} = -\operatorname{div} \vec{u}$$

Costa a l'é l'equassion ëd continuità.

Equassion dë stat

Se i consideroma che nòstr flùid a sia un flùid përfét, i savoma da la Termodinàmica che soe variàbij: pression P volum V e temperatura T , arferie a na grama-molécola, a son anlià da l'equassion dë stat : $PV = RT$.

St'equassion a përmëtt ëd calcolé la variassion ëd volum provocà da na variassion ëd pression. A venta 'ncora fé d'ipòtesi su coma a càpita 'l process. L'ipòtesi che a apròssima 'd pì la realtà a l'é cola 'd consideré sto procéss coma adiabàtich, suponend che as peussa trascuré jé scambi 'd calor che a peulo capitè fra le zone comprimùe e pì càode rispét a cole pì ràire e frèide, dal moment che 'l procéss a l'é 'd cita entità e a càpita tròp ampréssa pér avèj scambi 'd calor.

I arcordoma che i l'oma definì, an Termodinàmica, un γ coma rapòrt fra 'l calor spessìfich a pression costanta e 'l calor spessìfich a volum costant $\gamma = \frac{c_p}{c_v}$, e che pér na trasformassion adiabàtica fra doi stat 1 e 2 a val la relassion: $P_1 V_1^\gamma = P_2 V_2^\gamma$. Dàite donca condission nen përturbà con P_0 e V_0 , pér nö stat P e V genèrich a valo le relassion :

$$P = P_0 \left(\frac{V_0}{V} \right)^\gamma = P_0 \left(\frac{\rho}{\rho_0} \right)^\gamma$$

dal moment che ρ e V a son proporsionaj invers. Ëd costa espression i pijoma 'l diferensial :

$$dP = \gamma P_0 \left(\frac{\rho}{\rho_0} \right)^{\gamma-1} \frac{d\rho}{\rho_0}$$

Con variassion ëd densità cite costa espression a peul esse (bin) aprossimà a costa espression sì : $dP = \gamma P_0 \frac{\rho - \rho_0}{\rho_0}$.

A sta mira i consideroma che dP (variassion ëd pression) a l'é la pression sonora p , e donca i podoma scrive che : $p = \gamma p_0 \delta$. Derivand costa espression rispét al temp i otnoma:

$$\frac{1}{p_0} \frac{\partial p}{\partial t} = \gamma \frac{\partial \delta}{\partial t}$$

che a l'é l'equassion dë stat ant la forma che i sercavo.

Equassion ëd l'onda

A sta mira a basta combiné j'equassion ch'i l'oma trovà sì dzora, e i rivoma a scrive l'equassion general dl'onda dël son.

L'equassion ëd continuità an dà 'l valor $\frac{\partial \delta}{\partial t}$ da sostituì ant l'equassion dë stat e parèj i otnoma: $\frac{\partial p}{\partial t} = -\gamma p_0 \operatorname{div} \vec{u}$. I derivoma rispét al temp e i otnoma:

$$\frac{\partial^2 p}{\partial t^2} = -\gamma p_0 \operatorname{div} \frac{\partial \vec{u}}{\partial t}$$

Adéss i aplicoma l'operator divergensa a l'equassion d'Eulero e i ornama:

$$-\operatorname{div}(\operatorname{grad} p) = \rho_0 \operatorname{div} \frac{\partial \vec{u}}{\partial t}$$

che, arcordand ël significà dl'operator ëd Laplace, i podoma scrive : $-\nabla^2 p = \rho_0 \operatorname{div} \frac{\partial \vec{u}}{\partial t}$

Combinand cost'ùltima equassion con cola 'd prima i podoma eliminé 'l fator $\operatorname{div} \frac{\partial \vec{u}}{\partial t}$. I

l'oma, an efét: $\operatorname{div} \frac{\partial \vec{u}}{\partial t} = -\frac{1}{\gamma p_0} \frac{\partial^2 p}{\partial t^2}$ che, sostituì, a pòrta a $\nabla^2 p = \frac{\rho_0}{\gamma p_0} \frac{\partial^2 p}{\partial t^2}$

An costa equassion i butoma : $c = \sqrt{\gamma \frac{p_0}{\rho_0}}$ i otnoma l'equassion dl'onda :

$$\nabla^2 p = \frac{\partial^2 p}{\partial x^2} + \frac{\partial^2 p}{\partial y^2} + \frac{\partial^2 p}{\partial z^2} = \frac{1}{c^2} \frac{\partial^2 p}{\partial t^2}$$

Com i l'oma già vist, c a l'é la velocità 'd propagassion dël son.

Onde pian-e

I suponoma adéss che nòstra përturbassion as propaga pér onde pian-e, vis-a-dì con surfasse d'onda che a sio tute paralele e pian-e.

Sto modél a arpresenta bin la propagassion dël son ant na colòna d'ària, com a podrìa esse l'ària contrnùa ant un tubo.

La propagassion a càpita mach pì arlongh na dimension, mentre an sël pian normal a la diirection ëd propagassion as supon che tuti ij pont a sio ant j'istesse condission (pression sonòra ugual an tuti ij pont). L'equassion ëd prima a dventa antlora :

$$\frac{\partial^2 p}{\partial x^2} = \frac{1}{c^2} \frac{\partial^2 p}{\partial t^2}$$

I podoma 'dcò arcavé l'equassion èd n'onda pian-a con un procediment ch'a smija a col dovrà pér la propagassion ant na bara, e pér sòn is arferima a figura 8.




Figura 8 - Onda pian-a ant na colòna d'ària

I l'oma na colòna d'ària longa L , con na session A e na densità ρ , e arlongh la colòna, ant na posission x qualonque, i consideroma un cit segment èd colòna, longh dx .

Durant la vibrassion èl segment inissial dx e 'l segment instantani $dx + du$ spostà da la vibrassion e deformà dal moviment, a continran sempe l'istéssa massa d'ària $A \rho dx$. I podoma donca scrive :

$$A \rho dx = A(\rho + d\rho)(dx + du)$$

Da costa equassion i podoma arcavé $d\rho$:

$$\rho dx = (\rho + d\rho)(dx + du) ; \quad \rho dx = \rho dx + \rho du + d\rho dx + d\rho du$$

ma $d\rho du$ a l'é anfinitésim d'ordin superior, e donca as trascura.

$$0 = \rho du + d\rho dx ; \quad d\rho dx = -\rho du ; \quad d\rho = -\rho \frac{du}{dx}$$

I notoma, a sta mira, che na variassion èd pression dp a val: $dp = B \frac{d\rho}{\rho}$ andova B a l'é 'l mòdul d'elastissità a compression cùbica. Combinand sòn con lòn ch'i l'oma trovà as oten che

$$dp = -B \frac{du}{dx}$$

Adéss i pijoma l'equassion d'Eulero, aplicà a nòstr segment dx .

Tnisend cont che lè spostament u a l'é nen mach fonsion dla coordinà x ma 'dcò dèl temp, l'espression sì dzora a val se i consideroma le derivà parsiaj. A la fin i l'oma che la forsa che a agiss an sla prima facia a l'é dàita da la pression p d'arpòs pì la pression dp dàita da la variassion èd volum, e donca $f_1 = A \left(p - B \frac{\partial u}{\partial x} \right)$. Fra la prima e la sseconda facia a-i é na variassion dla pression

dàita da la variassion èd volum, che a sarà $\frac{\partial(d p)}{\partial x} dx$. I 'lavroma $f_2 = A \left(p - B \frac{\partial u}{\partial x} - B \frac{\partial^2 u}{\partial x^2} dx \right)$. Donca i l'oma che la massa $A \rho dx$ a l'ha n'acelerassion $\frac{\partial^2 u}{\partial t^2}$ provocà da la fòrsa $f_1 - f_2$. Vis-a-dì:

$$A \rho dx \cdot \frac{\partial^2 u}{\partial t^2} = A \left(p - B \frac{\partial u}{\partial x} \right) - A \left(p - B \frac{\partial u}{\partial x} - B \frac{\partial^2 u}{\partial x^2} dx \right)$$

che, semplificà, a pòrta a 'equassion :

$$\frac{\partial^2 u}{\partial t^2} = c^2 \frac{\partial^2 u}{\partial x^2}$$

andova, adéss, $c = \sqrt{\frac{B}{\rho}}$ a l'é la velocità 'd propagassion ant l'ària (a l'é ciàir che l'equassion a val èdcò pér j'autri flùid).

Sì i podoma arzòlve st'equassion ant n'autra manera rispét a prima. I foma na sostitussion èd variàbij, definend $r = t - \frac{x}{c}$ e $s = t + \frac{x}{c}$. I l'avroma donca che :

$$\frac{\partial r}{\partial x} = -\frac{1}{c} \quad ; \quad \frac{\partial r}{\partial t} = 1 \quad ; \quad \frac{\partial s}{\partial x} = \frac{1}{c} \quad ; \quad \frac{\partial s}{\partial t} = 1$$

Antlora i l'avroma che :

$$\frac{\partial u}{\partial x} = \frac{\partial u}{\partial r} \frac{\partial r}{\partial x} + \frac{\partial u}{\partial s} \frac{\partial s}{\partial x} = -\frac{1}{c} \frac{\partial u}{\partial r} + \frac{1}{c} \frac{\partial u}{\partial s}$$

$$\frac{\partial^2 u}{\partial x^2} = \frac{1}{c^2} \frac{\partial^2 u}{\partial r^2} \frac{\partial r}{\partial x} - \frac{1}{c^2} \frac{\partial^2 u}{\partial r \partial s} \frac{\partial s}{\partial x} + \frac{1}{c^2} \frac{\partial^2 u}{\partial s^2} \frac{\partial s}{\partial x} - \frac{1}{c^2} \frac{\partial^2 u}{\partial r \partial s} \frac{\partial r}{\partial x} = \frac{1}{c^2} \frac{\partial^2 u}{\partial r^2} - \frac{2}{c^2} \frac{\partial^2 u}{\partial r \partial s} + \frac{1}{c^2} \frac{\partial^2 u}{\partial s^2}$$

$$\frac{\partial u}{\partial t} = \frac{\partial u}{\partial r} \frac{\partial r}{\partial t} + \frac{\partial u}{\partial s} \frac{\partial s}{\partial t} = \frac{\partial u}{\partial r} + \frac{\partial u}{\partial s}$$

$$\frac{\partial^2 u}{\partial t^2} = \dots = \frac{\partial^2 u}{\partial r^2} + 2 \frac{\partial^2 u}{\partial r \partial s} + \frac{\partial^2 u}{\partial s^2}$$

Se i andoma a sostituì ant l'equassion d'onda 'd partensa, i otnoma che :

$$\frac{\partial^2 u}{\partial t^2} = c^2 \frac{\partial^2 u}{\partial x^2} \quad \text{equassion d'onda 'd partensa}$$

$$\text{sostituend e semplificand } \frac{\partial^2 u}{\partial r \partial s} = -\frac{\partial^2 u}{\partial r \partial s}$$

$$\text{e donca a venta ch'a sia } \frac{\partial^2 u}{\partial r \partial s} = 0$$

I podoma integré costa equassion prima rispét a r e peui rispét a s i otnoma :

$$u(r, s) = f(r) + g(s)$$

andova f e g a son doe fonsion arbitràrie. La solussion general dl'equassion d'onda antlora, tornand a nòstre variàbij x e t , a sarà:

$$u(x,t) = f\left(t - \frac{x}{c}\right) + g\left(t + \frac{x}{c}\right)$$

andova f e g a son sempe doe fonsion arbitràrie (vardé "Propagassion pér onde" ant la prima session, part set). Ste fonsion a son spessificà dal tipo d'përturbassion ch'as propaga.

Arsonansa 'd colònè d'ària.

I arpijoma 'l problema sì dzora, ma i lo arzolvoma com i l'avio fait pér le vibrassion longitudinaj ant la bara. I consideroma na colònà d'ària ant un tubo (com a podrià esse na cana d'òrgo) e i consideroma ij tre cas, andova la cana a l'é sarà ai doi estrem, a l'é duverta ai doi estrem, a l'é sarà a n'estrem e duverta a l'autr.

I partoma sempe da la solussion general dl'equassion d'onda scrita coma:

$$u(x,t) = \sum_{n=1}^{\infty} (A_n \cos p_n t + B_n \sin p_n t) \left(C_n \cos \frac{p_n}{c} x + D_n \sin \frac{p_n}{c} x \right)$$

e an costa solussion i andoma a impon-e nòstre condission al contorn.

Tubo sarà ai doi estrem

La figura d'arferiment a l'é figura 9, andova i l'oma apòrtà un tubo parèj con le onde (giusta ij prim termo dla somatòria) che a peulo stabilisse. I foma nen d'ipòtesi su coma na përturbassion a peussa esse antrodòta ant ël tubo, e i disoma che costa a l'é nen na situassion èd cana d'òrgo.

An costa situassion i l'avroma che j'é spostament a j'estrem dël tubo a saran zero, pérchè la parete rèida che a sara 'l tubo a lassa nen sposté 'l seul d'ària a contat. Donca, se 'l tubo a l'é longh L , i l'avroma :

$$u(0,t) = 0 \quad ; \quad u(L,t) = 0$$




Figura 9 - Arsonansa ant un tubo sarà ai doi estrem

Da sì i arcavoma, coma prima, che C_n a venta che a sia zero, e che $\sin \frac{p_n L}{c} = 0$. Donca ij valor p_n che a sodisfo a costa condission a son $p_n = \frac{n\pi c}{L}$ con n nùmer antregh qualonque. Airportand ste condission ant la solussion general i otnoma

$$u(x,t) = \sum_{n=1}^{\infty} (A_n \cos p_n t + B_n \sin p_n t) D_n \sin \frac{n\pi}{L} x$$

Se i vardoma còs i otnoma pér $n = 1$, i vëddoma che la longhëssa d'onda dla frequensa fondamental a val $\lambda = 2L$. Un tubo longh doi meter, pr'esempi, a l'ha na nòta fondamental con $\lambda = 4 m$, che a echival a na frequensa $f = \frac{c}{\lambda} = \frac{343}{4} = 85,75 Hz$ (i accordoma che un piano a part da un *LA* a $27,5 Hz$ e a riva a un *DO* a $4186 Hz$).

Tubo duvert ai doi estrem

Cost a peul esse na cana d'òrgo (cana duverta), andova la përturbassion a l'é prodovùa da un sofi d'aria che a riva an 's n'overtura fàita a "subiet".

An costa situassion le condission al contorn a son che ai doi estrem dël tubo la pression acùstica a val zero (pression dl'atmosfera nen përturbà). Sto fàit as esprim scrivend che :

$$\left[\frac{\partial u}{\partial x} \right]_{x=0} = 0 ; \quad \left[\frac{\partial u}{\partial x} \right]_{x=L} = 0$$

La solussion dl'equassion general as oten con un procediment ugual a col dël cas dla barra libera ai doi estrem, e a pòrta a l'istessa condission èd prima a propòsit dij valor che a peulo pijé ij parameter p_n .

Rispét al cas dël tubo sarà ai doi estrem, ch'i l'oma vist prima, la diferensa as peul vèdde an figura 10, andova ij neu e le panse dl'ossilassion a son an posission scambià rispét a la figura 9. Sòn pérchè a la fonsion "sen" as sostituiss la fonsion "cossen". An sto cas l'equassion dël moviment a dventa, an efét:

$$u(x,t) = \sum_{n=1}^{\infty} (A_n \cos p_n t + B_n \sin p_n t) C_n \cos \frac{n\pi}{L} x$$




Figura 10 - Arsonansa ant un tubo duvert ai doi estrem

Le frequense d'ossilassion dla cana a son donca j'istesse, e la frequensa fondamental a l'avrà na longhëssa d'onda $\lambda = 2 \cdot L$. Na cana d'òrgo che a deubia soné un *LA* bass a $27,5 \text{ Hz}$ a ventrìa che a fussa longa $6,26 \text{ m}$. ($L = c / [2f]$).

Tubo duvert a n'estrem e sarà a l'àutr

La procedura a l'é sempe dl'istéss tipo. Sempe suponend ël tubo longh L , is arferima a figura 11, andova 'l tubo a l'é arpresentà con l'estrem an $x = 0$ sarà e l'estrem $x = L$ duvert.




Figura 11 - Arsonansa ant un tubo duvert a n'estrem e sarà a l'àutr

An costa situassion la condission al contorn pér $x = 0$ a l'é $u(0, t) = 0$, mentre a l'àutr estrem, pér $x = L$, i l'oma che $\frac{du(L, t)}{dx} = 0$.

La prima condission a pòrta a avèj $C_n = 0$, mentre da la sonda condission as arcava che a venta ch'a sia $\cos \frac{p_n L}{c} = 0$, e donca che $p_n = \frac{n\pi c}{2L}$

L'equassion dël moviment èd l'aria a sarà donca dàita da:

$$u(x, t) = \sum_{n=1}^{\infty} D_n \sin \frac{n\pi x}{2L} (A_n \cos p_n t + B_n \sin p_n t)$$

As vëdd sùbit che la longhëssa d'onda dla frequensa fondamental a l'é 'l dobi rispét ai doi cas ch'i l'oma vist prima. Donca la frequensa fondamental, con l'istéssa longhëssa dël tubo, a l'é la metà rispét a prima. I l'avio vist che la cana duverta d'òrgo pér ël *LA* bass a $27,5 \text{ Hz}$ a ventrìa che a fussa longa $6,26 \text{ m}$. La cana sarà an ponta a basta ch'a sia longa $3,13 \text{ m}$.

Element d'l'onda dël son pian-a

A-i son quatr element che a carateriso n'onda pian-a 'd cole ch'i l'oma vist. Contut che stì concét as àpico a qualonque onda, sì is arferima mach a n'onda armònica sempia.

I l'oma prima 'd tut jé "spostament dle particole" dl'element che a propaga l'onda.

Peui i l'oma la "**pression acùstica**" dont i l'oma già dit quaicòs.

I l'oma 'ncora na "**velocità dle particole**"

An fin i l'oma la "**variassion èd densità**" che a corispond a la compression ant un pont.

Jé spostament dle particole a son coj da la posission d'echilibri che a l'avrio sensa la perturbassion acùstica. I l'oma vist che a peulo esse dëscrivù da l'equassion:

$$u(x, t) = A \cos(\omega t - kx)$$

andova i l'oma considerà mach ël vers positiv dla propagassion.

La pression acùstica p a l'é dàita da la pression instantània total meno la pression d'arferiment, che a-i sarìa se a-i fissa nen la përturbassion acùstica. As definiss èdcò na *pression acùstica eficenta* ant un pont coma la média quadràtica dle pression acùstiche instantànie che a-i son an col pont ant un ciclo complét. La pression acùstica a l'é dàita da $p = \rho c^2 \frac{\partial u}{\partial x}$, vis-a-dì:

$$p = -\rho c \omega A \sin(\omega t - kx)$$

andova i l'oma considerà mach ël vers positiv dla propagassion.

La velocità dle particole v a l'e giusta dàita da la derivà rispét al temp dlë spostament, e donca i l'avroma che :

$$v = \frac{\partial u}{\partial t} = -\omega A \sin(\omega t - kx)$$

andova i l'oma considerà mach ël vers positiv dla propagassion.

La variassion èd densità ant un dàit pont, che sì i ciamoma s , e che a l'é ciamà 'dcò "compression" a l'é cola ch'i l'oma già vist e che a l'é dàita coma variassion relativa da:

$$s = \frac{\rho - \rho_0}{\rho_0} = -\frac{\partial u}{\partial x}$$

Intensità dël son

As definiss coma "intensità dël son", la potensa média che a traversa l'unità 'd surfassa ant la diression èd propagassion. As trata 'd na potensa dividùa pér na surfassa e donca as misura an [Watt / m^2]. As trata dël travaj ant l'unità 'd temp su l'unità 'd surfassa, e donca 'ncora la fòrsa pér lë spostament ant l'unità 'd temp su l'unità 'd surfassa.

La pression a l'é na fòrsa pér unità 'd surfassa e la velocità a l'é nè spostament ant l'unità 'd temp. Donca se i anmaginoma un seul èd particole 'd surfassa unitària che a un dàit moment a l'han na pression acustica p e na velocità v , ant ël temp dt a l'avran nè spostament dx che a sarà dàit da $dx = v dt$. La fòrsa an sl'unità 'd surfassa a sarà giusta p , e donca $p dx$ a l'é 'l travaj elementar e $p v$ a l'é la potensa instantania.

Nòstra intensità a l'é definìa coma potensa media, e se i suponoma un son con andament sinusoidal, ò macassìa periòdich, i podoma calcolé sta média su un périod T dl'onda. Ant ël cas d'onde sinusoidaj i savoma che, pér na diression èd propagassion, lë spostament u a l'é $u = A \cos(\omega t - kx)$, e antlora la velocità a l'é $v = \frac{\partial u}{\partial t} = -\omega A \sin(\omega t - kx)$, e la pression a l'é

$p = \rho c^2 \frac{\partial u}{\partial x} = -\rho c \omega A \sin(\omega t - kx)$ e sòn dàit ël valor dla costant $k = \frac{\omega}{c}$. I podoma scrive che :

$$I = \frac{1}{T} \int_0^T p v dx = \int_0^T [-\rho c \omega A \sin(\omega t - kx)] [-\omega A \sin(\omega t - kx)] dt$$

Calcoland l'integral, còsa che i foma nen sì, as oten che $I = \frac{1}{2} \rho c \omega^2 A^2$. I l'oma vist che $p = \rho c^2 \frac{\partial u}{\partial x} = -\rho c \omega A \sin(\omega t - kx)$ e donca $-\rho c \omega A$ a l'é 'l valor màssim dla pression sonòra.

I l'oma definì prima un valor eficent dla pression, coma la média quadràtica dij valor dla pression an s'interval dla média. Pér na fonsion sinusoidal as dimostra fácil che sto valor eficent a l'é 'l valor màssim dividì pér la costant $\sqrt{2}$. Se donca i ciamoma $\hat{p} = \frac{-\rho c \omega A}{\sqrt{2}}$ sto valor pér la pression, i l'avroma che $I = \frac{\hat{p}^2}{\rho c}$

Densità d'energia

As definiss coma "densità d'energia" ant un mojen, l'energia pér unità 'd volum dàita da la propagassion dla përturbassion. L'energia sonòra a l'é an part potensial (ò elàstica), dàita da lë spostament elàstich dle particole, e an part cinética, dàita da la velocità dle particole mideme. L'adission èd coste doe energie as conserva se a-i son nen dispersion. Ant nè stat stassionari le pèrdite a son compensà da l'emission dla sorgent.

La part potensial dl'energia a l'é dàita dal travaj che la pression acùstica a fà pér cambié 'l volum. L'energia Ep dë sto tipo a un dàit moment a corispond al travaj pér porté 'l volum da le condission d'arpòs (con pression p_0) a le condission dël moment. Vis-a-dì $Ep = \int_{p_0}^{p'} p' \cdot dV'$ con p' pression istantània e V' volum instantani. I accordoma che $dV' = -\frac{V dp'}{B}$, andova B a l'é 'l mòdul d'elastissità a compression cùbica. Antlora i podoma scrive che:

$$Ep = \frac{V}{B} \int_{p_0}^{p'} p' dV' = \frac{V}{2B} \left[(p')^2 - p_0^2 \right]$$

e se i ciamoma $p = p' - p_0$ la pression acùstica, i l'avroma che $(p')^2 - p_0^2 = 2p p_0 + p^2$ com as verifìca sùbit. Donca nòstra energia potensial a sarà $Ep = \frac{V(2p p_0 + p^2)}{2B}$.

Pér n'onda pian-a armònica i l'oma che la pression p a val $p = \rho c \dot{x}$, andova \dot{x} a l'é la velocità dlë spostament, mentre $B = c^2 \rho$. L'energia cinética Ec a l'é sempe dàita da $Ec = \frac{1}{2} m v^2$, che an nòstr cas a l'é : $Ec = \frac{1}{2} \rho V \dot{x}^2$. L'energia total a arzulta donca:

$$Et = \frac{1}{2} \rho V \dot{x}^2 + \frac{V(2p p_0 + p^2)}{2B} = V \left(\rho \dot{x}^2 + \frac{p_0 \dot{x}}{c} \right)$$

com a arzulta fasend le sostitussion e semplificand.

Nòstra densità instantania De a l'é pér unità 'd volum, e donca a val : $De = \rho \dot{x}^2 + \frac{p_0 \dot{x}}{c}$. Se i voroma trové la media Dem arferìa a un perìod T , suponend che lë spostament x a sia la fonsion sinusoidal $x(t) = A \cos(\omega t - kx)$, e che donca $\dot{x}(t) = -\omega A \sin(\omega t - kx)$, i l'avroma (sensa sté a fê tuti ij càlcoj) :

$$Dem = \frac{1}{T} \int_0^T \left(\rho \dot{x}^2 + \frac{p_0 \dot{x}}{c} \right) dt = \frac{1}{2} \rho \omega^2 A^2$$

I podoma 'dcò consideré che l'energia ant l'unità 'd volum a sarà cola che a traversa la surfassa unitària ant l'unità 'd temp, dividùa pér la distansa pëcorùa ant l'unità 'd temp. Ma 'l

dividend a l'é nen d'autr che l'intensità média e 'l divisor a l'é nen d'autr che la velocità d'el son.

Antlora a venta ch'a sia $Dem = \frac{I}{c}$ ma i l'oma che $I = \frac{\hat{p}^2}{\rho c}$ e i l'oma 'dcò che $\hat{p} = \frac{-\rho c \omega A}{\sqrt{2}}$. Se i foma

le sostitussion i otnoma lòn ch'i l'oma vist sì dzora : $Dem = \frac{\hat{p}^2}{\rho c^2} = \frac{1}{2} \rho \omega^2 A^2$

Potensa d'el son

Se i suponoma na sors èd son che a manda energìa ant èl mojen e i suponoma che a sia l'ùnica sors ant èl camp d'anterésse, i disoma che l'energìa che a ven emèttùa ant l'unità 'd temp a l'é la potensa P_s dla sors (an Watt). I podoma supon-e na surfassa S qualonque antorna a la sors che a la environ-a al complét. Se i arpijoma 'l concé d'intensità I_s , i podoma dì che la potensa dla sors a sarà dàita da:

$$P_s = \int_S I_s dS \quad [W]$$

I suponoma che la radiassion d'energìa a sia uniform an tute le diression e che la surfassa antorna a la sors a sia giusta cola èd na sféra con ragg r . I l'avorma che che la potensa P_s a sarà :

$$P_s = 4 \cdot \pi \cdot r^2 \cdot I_s \quad [W]$$

andova I_s a l'é l'intensità an qualonque diression a la distansa r da la sors. A sta mira i podoma buté ant la relassion èl valor dl'intensità d'el son ch'i l'oma arcavà prima, e i otnoma :

$$P_s = 4 \cdot \pi \cdot r^2 \cdot \frac{\hat{p}^2}{\rho_0 \cdot c} \quad [W]$$

La potensa dla sors as treuva doncà misurand l'intensità a na dàita distansa da la sors.

Impedensa

I consideroma un sens èd propagassion (vers j'x positive) e i scrivoma la fonsion dla pression acùstica p , che a sarà $p = f\left(t - \frac{x}{c}\right)$. Da j'equassion d'Eulero (sì i consideroma mach la variàbil x), i podoma arcavé la velocità v_x dlë spostament. An efét a val la relassion :

$$\rho_0 \frac{\partial v_x}{\partial t} = -\frac{\partial p}{\partial x} = -\frac{\partial}{\partial x} \left[f\left(t - \frac{x}{c}\right) \right] = \frac{1}{c} f'\left(t - \frac{x}{c}\right)$$

andova f' a ìndica la derivà rispét a la variàbil $\left(t - \frac{x}{c}\right)$ e $-1/c$ a l'é la derivà dla variàbil rispét a x .

Si i dividoma pér ρ_0 i l'oma che $\frac{\partial v_x}{\partial t} = \frac{1}{c \rho_0} f'\left(t - \frac{x}{c}\right)$. Da sì i arcavoma che $v_x = \frac{1}{c \rho_0} f\left(t - \frac{x}{c}\right)$

I l'oma doncà, ant èl cas d'onda pian-a ch'as propaga, che pression p e velocità v_x a l'han l'istéssa espression, gavà un fator real. A son doncà sempe an fase fra 'd lor e sò rapòrt a l'é un nùmer real costant :

$$\frac{p}{v} = c \rho_0$$

Sto rapòrt a ven ciàmà "**impedensa carateristica** Z_0 ", che a dipend giusta da le carateristiche dël mojen èd propagassion. I l'oma donca che :

$$\frac{P}{V} = c \rho_0 = Z_0$$

Cost a l'é un cas particolar, che as àpica a j'onde pian-e che as propago libere (sensa riflession, com i vöddroma peui) e as àpica nen, pr'esempi, a j'onde sfériche (i lo vöddroma dòp).

An general èl rapòrt ch'i l'oma dit a l'é nen un nùmer real, pérchè a-i é na differensa 'd fàse fra pression e velocità. L'impedensa, che an sto cas as dis "**impedensa spessifìca**" a dventa un nùmer compléss : $Z_0 = R_0 + i X_0$ con R_0 dita "**resistensa spessifìca**" e X_0 dita "**reatansa spessifìca**".

Onde sfériche

I l'oma già vist che, an general, l'onda dël son che as propaga ant lë spassi, cand a l'é arferìa a un sistema d'ass cartesian ortogonaj, a l'ha la forma general:

$$\frac{\partial^2 p}{\partial x^2} + \frac{\partial^2 p}{\partial y^2} + \frac{\partial^2 p}{\partial z^2} = \frac{1}{c^2} \frac{\partial^2 p}{\partial t^2}$$

I podoma serché na solussion èd costa equassion con la técника dla separassion dle variàbij, an manera che a l'àbia la forma : $p = X(x) \cdot Y(y) \cdot Z(z) \cdot T(t)$, andova ognidun dij fator a l'é fonsion mach èd na variàbil sola. Sostituend as oten:

$$\frac{1}{X} \frac{d^2 X}{dx^2} + \frac{1}{Y} \frac{d^2 Y}{dy^2} + \frac{1}{Z} \frac{d^2 Z}{dz^2} = \frac{1}{c^2 T} \frac{d^2 T}{dt^2}$$

Costa equassion a venta ch'a sia sempe verificà, contut che 'l prim member a sia fonsion mach èd x, y, z e lë scond member a sia mach fonsion èd t . Sòn a l'é possìbil mach se ij doi member a son uguaj a na costant. I ciàmoma sta costant $-k_I^2$. I l'oma donca le doe equassion:

$$\frac{1}{c^2 T} \frac{d^2 T}{dt^2} = -k_I^2 \quad \text{vis - a - dì} \quad \frac{d^2 T}{dt^2} + c^2 k_I^2 T = 0$$

$$\frac{1}{X} \frac{d^2 X}{dx^2} + \frac{1}{Y} \frac{d^2 Y}{dy^2} + \frac{1}{Z} \frac{d^2 Z}{dz^2} = -k_I^2$$

A la sonda equassion i podoma apliché torna l'istéss procediment. An efét i podoma scrivla coma : $\frac{1}{Y} \frac{d^2 Y}{dy^2} + \frac{1}{Z} \frac{d^2 Z}{dz^2} = -k_I^2 - \frac{1}{X} \frac{d^2 X}{dx^2}$ e, sempe pér la rason èd prima, ij doi member a venta ch'a sio uguaj a na costant. I podoma scrive che :

$$-k_I^2 - \frac{1}{X} \frac{d^2 X}{dx^2} = -k_I^2 + k_2^2 \quad \text{vis - a - dì} \quad \frac{d^2 X}{dx^2} + k_2^2 X = 0$$

Ant l'istessa manera, sensa arpete tuti ij passagi, as treuvo j'autre doe equassion

$$\frac{d^2 Y}{dy^2} + k_3^2 Y = 0 \quad ; \quad \frac{d^2 Z}{dz^2} + k_4^2 Z = 0$$

Ste quatr equassion a peulo esse integrà e a dàn, coma solussion, ant l'órdin :

$$T(t) = A_1 \sin ck_1 t + B_1 \cos ck_1 t$$

$$X(x) = A_2 \sin k_2 x + B_2 \cos k_2 x$$

$$Y(y) = A_3 \sin k_3 y + B_3 \cos k_3 y$$

$$Z(z) = A_4 \sin k_4 z + B_4 \cos k_4 z$$

An costa manera na solussion d'equassion a arzulta esse :

$$p(x, y, z, t) =$$

$$= (A_1 \sin ck_1 t + B_1 \cos ck_1 t)(A_2 \sin k_2 x + B_2 \cos k_2 x)(A_3 \sin k_3 y + B_3 \cos k_3 y)(A_4 \sin k_4 z + B_4 \cos k_4 z)$$

An nòstr but is limitoma a consideré la propagassion d'onde sfériche. Se i suponoma na sors èd vibration sonore che as treuva ant un mojen omogéni e isòtrop e che a emëtta energìa sonora an tute le diression a l'istessa manera, antlora le surfasse d'onda (pont con l'istéssa ampiëssa e istessa fase), a saran surfasse sfériche con senter ant la sors.

An sto cas l'equassion as peul arferì a un sistema 'd coordinà sfériche, dal moment che, dàita la simetria dël fenòmeno, tute le grandësse an geugh a dipendo mach dal temp t e da la coordinà radial r che a dà la distansa dël pont générich dal senter èd simetria.

Le coordinà sfériche, dont i doma n'arpresentassion an figura 12, as peulo arcavé da le coordinà cartesian-e ortogonaj considerand ël pian che a passa pér ël générich pont P e l'ass z . Su sto pian, la distansa fra l'orìgin, comun-a ai doi sistema, e 'l pont P a arpresents la coordinà r . L'angol che 'l pian a forma con ël pian xz a l'é la coordinà ϕ , mentre l'angol fra l'ass z e 'l ragg vedor r a arpresents la coordinà θ .

An coste condission la conversion èd coordinà a l'é dàita da j'equassion:

$$x = r \cdot \sin \theta \cdot \cos \phi$$

$$y = r \cdot \sin \theta \cdot \sin \phi$$

$$z = r \cdot \cos \theta$$




Figura 12 - Coordinà sfériche

La conversion, da 's pér chila, a l'é pitòst complicà e sì i la foma nen an tuti ij passagi. I disoma mach che l'equassion d'onda general, na vira convertìa an coste coordinà, a pija la forma:

$$\frac{\partial^2 p}{\partial r^2} + \frac{1}{r^2} \frac{\partial^2 p}{\partial \theta^2} + \frac{1}{r^2 \sin \theta^2} \frac{\partial^2 p}{\partial \phi^2} + \frac{2}{r} \frac{\partial p}{\partial r} + \frac{1}{r^2 \tan \theta} \frac{\partial p}{\partial \theta} = \frac{1}{c^2} \frac{\partial^2 p}{\partial t^2}$$

Ant ël cas d'onde con simetria sférica, la fonsion p a sarà mach dipendenta da r e da t , e donca a sarà $p(r, t)$. L'equassion general as arduv a :

$$\frac{\partial^2 (rp)}{\partial r^2} = \frac{1}{c^2} \frac{\partial^2 (rp)}{\partial t^2}$$

Costa equassion a peul esse 'dcò arcavà da l'equassion general an coordinà cartesian-e tnisend cont che :

$$r^2 = x^2 + y^2 + z^2 \quad \text{e che} \quad \frac{\partial r}{\partial x} = \frac{x}{r}$$

I podoma donca dì che $\frac{\partial p}{\partial x} = \frac{\partial p}{\partial r} \frac{\partial r}{\partial x} = \frac{\partial p}{\partial r} \frac{x}{r}$ e se i derivoma costa espression rispét a x i

l'avroma :

$$\frac{\partial^2 p}{\partial x^2} = \frac{1}{r} \frac{\partial p}{\partial r} - \frac{x}{r^2} \frac{\partial p}{\partial r} \frac{\partial r}{\partial x} + \frac{x}{r} \frac{\partial^2 p}{\partial r^2} \frac{\partial r}{\partial x} = \frac{x^2}{r^2} \frac{\partial^2 p}{\partial r^2} + \left(\frac{1}{r} - \frac{x^2}{r^3} \right) \frac{\partial p}{\partial r} = \frac{x^2}{r^2} \frac{\partial^2 p}{\partial r^2} + \frac{y^2 + z^2}{r^3} \frac{\partial p}{\partial r}$$

e a l'istessa manera as oten-o le espression :

$$\frac{\partial^2 p}{\partial y^2} = \frac{y^2}{r^2} \frac{\partial^2 p}{\partial r^2} + \frac{x^2 + z^2}{r^3} \frac{\partial p}{\partial r} ; \quad \frac{\partial^2 p}{\partial z^2} = \frac{z^2}{r^2} \frac{\partial^2 p}{\partial r^2} + \frac{x^2 + y^2}{r^3} \frac{\partial p}{\partial r}$$

Da coste tre espression i podoma dì che 'l prim member dl'equassion general a val :

$$\frac{\partial^2 p}{\partial x^2} + \frac{\partial^2 p}{\partial y^2} + \frac{\partial^2 p}{\partial z^2} = \frac{x^2}{r^2} \frac{\partial^2 p}{\partial r^2} + \frac{y^2 + z^2}{r^3} \frac{\partial p}{\partial r} + \frac{y^2}{r^2} \frac{\partial^2 p}{\partial r^2} + \frac{x^2 + z^2}{r^3} \frac{\partial p}{\partial r} + \frac{z^2}{r^2} \frac{\partial^2 p}{\partial r^2} + \frac{x^2 + y^2}{r^3} \frac{\partial p}{\partial r}$$

Semplificand e cheujend a fator comun i l'oma giusta che :

$$\frac{\partial^2 p}{\partial x^2} + \frac{\partial^2 p}{\partial y^2} + \frac{\partial^2 p}{\partial z^2} = \frac{x^2 + y^2 + z^2}{r^2} \frac{\partial^2 p}{\partial r^2} + \frac{2(x^2 + y^2 + z^2)}{r^3} \frac{\partial p}{\partial r} = \frac{\partial^2 p}{\partial r^2} + \frac{2}{r} \frac{\partial p}{\partial r}$$

I notoma che se i consideroma la fonsion $r \cdot p$, s val la relassion :

$$\frac{\partial^2 p}{\partial x^2} + \frac{\partial^2 p}{\partial y^2} + \frac{\partial^2 p}{\partial z^2} = \frac{1}{r} \frac{\partial^2 (rp)}{\partial r^2}$$

I notoma peui che r a l'é na variabil andipendenta che a dipend nen dal temp t , e donca i l'avroma che : $\frac{\partial^2 (rp)}{\partial t^2} = r \frac{\partial^2 p}{\partial t^2}$. Se i andoma a sostituì lòn ch'i l'oma trovà ant l'equassion d'onda

$$\frac{\partial^2 p}{\partial x^2} + \frac{\partial^2 p}{\partial y^2} + \frac{\partial^2 p}{\partial z^2} = \frac{1}{c^2} \frac{\partial^2 p}{\partial t^2} \quad \text{i otnoma l'espression :}$$

$$\frac{\partial^2 (rp)}{\partial r^2} = \frac{1}{c^2} \frac{\partial^2 (rp)}{\partial t^2}$$

A sta mira, se i consideroma coma fonsion incògnita $r \cdot p$, anvece che mach p , i l'oma che le solussion a son dël tipo:

$$r p = f\left(t - \frac{r}{c^2}\right) + g\left(t + \frac{r}{c^2}\right)$$

e divident pér r as oten la fonsion dla pression p .

$$p = \frac{I}{r} f\left(t - \frac{r}{c^2}\right) + \frac{I}{r} g\left(t + \frac{r}{c^2}\right)$$

Costa solussion a arpresentsa doe onde, dont la prima a part dal senter (sors dël son) e a divergg, mentre la sonda a convergg vers la sors. A l'é natural che se 'l son a peul propaghésse liber, mach la prima onda a l'ha un significà. Le fonsion f e g a dipendo da che përturbassion a ven generà e a la arpresentso. La pression sonòra a donca cala con la distansa.

Se la përturbassion generà a l'é na fonsion armònica con na dàita pulsassion ω , antlora la solussion a dventa:

$$p = \frac{P_{max}}{r} \cos(\omega t - k r + \varphi_0)$$

andova P_{max} a l'é la pression massima 'd partensa, k a val ω/c e a l'é ciamà "nùmer d'onda" mentre φ_0 a l'é la fase inissial.

Element dl'onda dël son sférica

Pér l'onda sférica as definisso tre element d'interésse che a son : La "**pression acùstica**" don i l'oma dit. Jë "**spostament dle particole**" dl'element che a propaga l'onda. Peui i l'oma la "**velocità dle particole**". An fin i l'oma la "**variassion èd densità**" che a corispond a la compression ant un pont.

La pression acùstica a l'é cola ch'i l'oma studià sì dzora. Pér na përturbassion armònica sempia la pression acùstica a l'é dàita da :

$$p = \frac{P_{max}}{r} \cos(\omega t - k r + \varphi_0)$$

J'autri element definì a son fonsion dla pression. Jë spostament u dle particole a son coj da la posission d'echilibri ch'a l'avriò sensa la perturbassion acùstica.

$$u = -\left(\frac{I}{r} + i k\right) \frac{p}{\omega^2 \rho}$$

La velocità v dle particole a ven da la derivà dlë spostament fàita rispét al temp, e a arzulta esse dàita da :

$$v = \left(\frac{I}{r} + i k\right) \frac{p}{i \omega \rho}$$

An fin i definima la compression s coma prima (cas dle onde pian-e), che sì a arzulta esse dàita da:

$$s = \frac{p}{\rho c^2}$$

I stoma nen a dé dimostrassion èd cose relassion.

Intensità dël son

Coma pér el cas dj'onde pian-e, l'intensità acùstica I a l'é la portà media d'energia acustica pér unità 'd surfassa. Ëdcò sì is limitoma a n'onda sferica divergente e armònica. An sto cas la media a ven fàita su un period T dl'ossilassion. Se p a l'é la pression acùstica istantania e v la velocità instantania dle particole, i l'oma che :

$$I = \frac{1}{T} \int_0^T p v dt = \frac{1}{T} \int_0^T P \cos(\omega t - k x) \cdot V \cos(\omega t - k x - \theta) \cdot dt$$

andova P a l'é la pression massima, V a l'é la velocità massima e θ a l'é l'angol èd fase fra pression e velocità. Fasend l'integral as oten che $I = \frac{1}{2} P V \cos \theta$.

I podoma dovré, pér la pression e la velocità, ij valor eficent, che a son, ant l'ordin $\hat{p} = \frac{P}{\sqrt{2}}$ e $\hat{v} = \frac{V}{\sqrt{2}}$ e antlora i otnoma che $I = \hat{p} \hat{v} \cos \theta$.

$$\text{L'angol èd fase } \theta \text{ a l'é dàit da } \theta = \arccos \left(\frac{k r}{\sqrt{1 + k^2 r^2}} \right)$$

Densità d'energia

I ciamoma sempe "**densità d'energia**" D l'adission dl'energia cinética Ec e dl'energia potensial Ep , ant un dàit instant, pér unità 'd volum dël mojen sede dla përturbassion.

Se i consideroma 'l volum medi V_0 e la densità media ρ , i l'avroma la massa $m = V_0 \rho$, che a l'ha na velocità media eficenta v . Soa energia cinética Ec a sarà : $Ec = \frac{1}{2} \rho V_0 v^2$ e se i dovroma la velocità eficenta $v = \frac{v_0}{\sqrt{2}}$, con v_0 velocità màssima, i l'avroma : $Ec = \frac{1}{4} \rho V_0 v_0^2$. Che a l'é l'energia instantània media.

L'energia potensial Ep instantània, an sto cas, a l'é l'energia elàstica che a echival al travaj fait da la pression pér modifiché 'l volum, e donca : $Ep = - \int p dV$ andova p e V a son pression e volum instantani. La relassion che a anlìa pression p e volum V a l'é : $V = V_0 \left(1 - \frac{p}{\rho c^2} \right)$ e donca i l'oma che $dV = - p V_0$. L'energia potensial instantània a l'é donca :

$$Ep = \frac{V_0}{\rho c^2} \int_0^p p dp = \frac{p^2 V_0}{2 \rho c^2}$$

Se i dovroma 'l valor eficent pér p , con p_0 piàit coma valor màssim, i podoma dì che an media l'energia potensial instantània a l'é : $Ep = \frac{p_0^2 V_0}{4 \rho c^2}$.

Adéss i vardoma ij valor pér p e v . Sempe considerand n'onda sférica armònica sempia, pér la pression p i l'avroma che $p = \frac{A}{r} \cos(\omega t - k r) = p_0 \cos(\omega t - k r)$, mentre pér la velocità v i l'avroma

che $v = p \begin{pmatrix} \frac{1}{r} + ik \\ \frac{r}{i\rho\omega} \end{pmatrix} = \left(\frac{A\sqrt{1+k^2 r^2}}{\rho c k r^2} \right) \cos(\omega t - k r - \theta)$ e da costa espression a ven che v_0 , valor màssim dla velocità, a val $v_0 = \left(\frac{A\sqrt{1+k^2 r^2}}{\rho c k r^2} \right)$.

A sta mira i podoma scrive l'espression dla densità d'energia D coma :

$$D = \frac{Ec + Ep}{V_0} = \frac{1}{4} \rho v_0^2 + \frac{p_0^2}{\rho c^2}$$

e sostituend ij valor ch'i l'oma trovà sì dzora a arzulta, dòp le semplificassion :

$$D = \frac{p_0^2}{2\rho c^2} \left(1 + \frac{1}{2k^2 r^2} \right)$$

Impedensa

I l'oma vist che pér j'onde pian-e l'impedensa, definìa coma rapòrt fra pression acùstica e velocità dë spostament dle partìcole $\frac{p}{v} = c \rho_0$ a l'é na costant che a dipend da le caratteristiche dël mojen ëd propagassion, e a l'é un nùmer real.

Se i consideroma adéss n'onda sferica armònica, i podoma scrive l'equassion dla pression, com i l'oma vist ant le nòte 'd matemàtica, ant la forma:

$$p = \frac{P}{r} e^{i(\omega t - kr)}$$

(i a l'é l'unità anmaginària), mentre pér le component dla velocità v_x, v_y, v_z dle partìcole a valo le relassion:

$$-\frac{\partial p}{\partial x} = \rho \frac{\partial v_x}{\partial t} ; \quad -\frac{\partial p}{\partial y} = \rho \frac{\partial v_y}{\partial t} ; \quad -\frac{\partial p}{\partial z} = \rho \frac{\partial v_z}{\partial t}$$

e donca a arzulta che $-\frac{\partial p}{\partial r} = \rho \frac{\partial v}{\partial t}$ andova v a l'é la velocità radial dle partìcole. Donca 'l gradient ëd pression a l'é proporsional diret a l'acelerassion radial. I podoma integré l'equassion e i otnoma la velocità radial v :

$$v = -\frac{1}{\rho} \int \frac{\partial p}{\partial r} dt = -\frac{1}{i\rho\omega} \frac{\partial p}{\partial r} = \left(\frac{1}{r} + ik \right) \frac{p}{i\rho\omega}$$

Se adéss i scrivoma 'l rapòrt dl'impedensa acùstica i l'avroma (i arcordoma che $\omega = c k$):

$$Z = \frac{p}{v} = \frac{p}{\left(\frac{1}{r} + ik \right) \frac{p}{i\rho\omega}} = \frac{i\rho\omega}{\frac{1}{r} + ik} = \frac{i\rho c k r}{1 + ik r} = \frac{\rho c k^2 r^2}{1 + k^2 r^2} + i \frac{\rho c k r}{1 + k^2 r^2}$$

I l'oma donca na part real (ciamà "resistensa acùstica spessifìca") e na part anmaginaria (ciamà "reatansa acùstica spessifìca").